



PAENITENTIARIA APOSTOLICA

Prot. N. 236/17/I

B E A T I S S I M E P A T E R ,

Iosephus Górzynski, Archiepiscopus Metropolita Varmien., a Sanctitate Tua plenariam implorat Indulgentiam pro fidelibus qui, vere paenitentes atque caritate compulsi, sese sacramentali Confessione purificantes et SS.ma Eucharistia reficientes, preces demum ad mentem eiusdem Sanctitatis Tuae pie fundentes, Sanctuarium Beatae Mariae Virginis de "Gietrzwald", praefatae Archidioeceseos, a die I proximi mensis Maii usque ad diem XXXI Octobris MMXVII pie invisent, diebus praesertim in quibus peculiaria devotionis marianae exercitia magno cum populi concursu peragentur, ad digne commemo randum centesimum et quadragesimum anniversarium ex quo Beata Maria Virgo duabus puellis ibi apparuit.

Et Deus, etc.

Die X Aprilis MMXVII

PAENITENTIARIA APOSTOLICA, de Summi Pontificis Francisci mandato, perlitter plenariam largitur *Indulgentiam* christifidelibus qui, supra indicatis condicionibus rite adimpletis, Sanctuarium Beatae Mariae Virginis de "Gietrzwald" in forma peregrinationis devote visitaverint et ibi iubilaribus celebrationibus, sollemnitatibus peculiaribusque circumstantiis, de consensu Exc.mi Episcopi determinatis, alicuique sacro ritui vel pio exercitio in honorem Sanctae Deiparae Virginis peractis, attente ac religiose interfuerint, vel saltem, ante sacram eiusdem Imaginem animo piis considerationibus intento constiterint per congruum temporis spatium, concludendum Oratione Domini na, Symbolo Fidei atque invocationibus Sanctissimae Virginis Mariae.

Senes, infirmi, omnesque qui gravi causa domo exire nequeunt, pariter plenariam consequi poterunt *Indulgentiam*, concepta detestatione cuiusque peccati et intentione praestandi, ubi primum licuerit, tres consuetas condiciones si, coram aliqua parva Beatae Mariae Virginis de "Gietrzwald" imagine, iubilaribus functionibus se spiritualiter adiunixerint, precibus ac doloribus suis vel incommodis propriae vitae misericordi Deo per Mariam oblatis.

Quo igitur accessus, ad divinam veniam per Ecclesiae claves consequendam, facilior pro pastorali caritate evadat, haec Paenitentiaria enixe rogat ut sacerdotes opportunis facultatibus ad confessiones excipiendas praediti, in iubilari Sanctuario prompto et generoso animo, celebrationi Paenitentiae sese praebeant ac S. Communionem infirmis saepe ministrent.

Praesenti totum per spatium Mariani Iubilaei valituro. Contrariis qui-
buslibet minime obstantibus.

Maurus Card. Piacenza

MAURUS Card. PIACENZA
Paenitentiarius Maior

Christophorus Nykiel

CHRISTOPHORUS NYKIEL
Regens



PAENITENTIARIA APOSTOLICA

Prot. N. 237/17/I

DECRETUM

PAENITENTIARIA APOSTOLICA, vi facultatum sibi specialissimo modo a Sanctissimo in Christo Patre et Domino Nostro, Domino Francisco Divina Providentia Papa tributarum, Exc.mo ac Rev.mo Patri Domino Iosepho Górzynski, Archiepiscopo Metropolitae Varmien., benigne concedit ut, in iubilaeo Beatae Mariae Virginis de "Gietrzałd", die pro fidelium utilitate eligendo, post litatum divinum Sacrificium, impertiat omnibus christifidelibus adstantibus, qui vere paenitentes atque caritate compulsi iisdem sacris interfuerint, **papalem Benedictionem** cum adnexa *plenaria Indulgentia*, suetis sub condicionibus (sacramentali Confessione, eucharistica Communione et Oratione ad mentem Summi Pontificis) lucranda.

Christifideles qui **papalem Benedictionem** devote acceperint, etsi, rationabili circumstantia, sacris ritibus physice non adfuerint, dummodo ritus ipsos, dum peraguntur, ope instrumenti televisifici vel radiophonici propagatos pia mentis intentione secuti fuerint, *plenariam Indulgentiam*, ad normam iuris, consequi valebunt.

Contrariis quibuslibet non obstantibus.

Datum Romae, ex aedibus Paenitentiariae Apostolicae, die X mensis Aprilis, anno Domini MMXVII.

MAURUS Card. PIACENZA
Paenitentiarius Maior

CHRISTOPHORUS NYKIEL
Regens